



Ocjena situacije u Brčkom odražava svakodnevnu stvarnost

Novoimenovani predsjedavajući arbitar Arbitražnog tribunala za Brčko, Clint Williamson, danas je nastavio svoju trodnevnu posjetu Bosni i Hercegovini. U utorak, ambasador Williamson se sastao sa najvišim zvaničnicima u Sarajevu, uključujući i premijera Federacije BiH Fadila Novalića i arbitra Ćazima Sadikovića. Danas je u Brčkom prisustvovao proslavi kojom je obilježeno 17 godina od osnivanja Distrikta. Sastao se sa gradonačelnikom Sinišom Milićem i njegovim zamjenikom Antom Domićem, predsjedavajućim Skupštine Distrikta Brčko Esedom Kadrićem i njegovim zamjenikom Ivom Filipovićem te sa arbitrom imenovanim ispred RS, Sinišom Karanom.

Tokom svoje posjete Bosni i Hercegovini, ambasador Williamson je objasnio da je njegov mandat isti kao i mandat njegovog prethodnika, Roberta B. Owena, koji je obavljao dužnost predsjedavajućeg arbitra sve do svoje smrti u martu prošle godine. Rekao je da je ova posjeta bila prilika da "dobije sliku o napretku koji su entiteti postigli kako bi u potpunosti ispoštovali obavezu da omoguće uspostavu institucija Distrikta i pomognu da se osigura efikasno funkcioniranje tih institucija."

Ambasador Williamson je rekao da uspostava stalnih i efikasnih institucija "jeste izazov, ali smo tokom godina bili svjedoci da institucije postaju efikasne i samoodržive kada građanima Brčkog pokažu svoju vrijednost. Tako da ocjena situacije nije puka papirologija, nego nešto što odražava stvarnost svakodnevnog života u Brčkom i usluga koje se građanima pružaju."